

■ OR DA LA VITA DA LUDMILLA CAHENZLI

Pommes chipes ed ils paupers ritgs

Mardi: «Atgnamain èsi schon ina malgistadad nunditga. Ils ritgs ston pajar tanta taglia. E nus auters vivin sin las costas da quests paupers ritgs.» Tals patratgs van tras mes chau cura ch’jau legel en la gasetta ch’ils ritgs e las interpresas finanzieschan 60 pertschient da noss stadi. Jau fatsch il propiest da votar «gea» la proxima giada, sch’i va per scursanir la taglia dals ritgs. Igl è simplamain malgist ch’ina pitschna minoritad sto finanzia il rest da la populaziun.

Mesemna: Jau sun en pasternaria ed avrel mia bursa per pajar mes paunet da salami. Tge schoc! Jau hai mo pli duas notas da diesch ed in zitg munaida. Nunpussai! Ier avev jau

anc 170 francs en la bursa che duevan tanscher fin il glindesdi. Tgi ha engulà mes raps? Forsa mes um Eugen? Forsa ha el prendì oz en damaun raps ord mia bursa perquai ch’el n’aveva betg pedad ir tar il bancomat.

Lura ma vegni endament: Ier sun jau gea stada cun mia figlia a cumprar chalzers. Jau avev gi en senn da cumprar chalzers per 40 francs. La finala è mia figlia sortida da la stizun cun chalzers per 90 francs. Ella è stada tut inchantada, m’ha dà bunas dretg e sanester e ditg ch’jau saja la meglra «mami» dal mund. Suentar essan nus anc idas dabot en stizun a cumprar pommes chipes, ed jau hai gist anc mess en il chanaster duas-trais chaussas che mancavan en frestgera, ed a la

cassa hai jau lura stuì pajar pli che 50 francs per ils pommes chipes. Chalzers + pommes chipes = 145 francs.

Tge far? Il conto è ferm en il minus. Nungrazia da prender giu anc ina giada tschient francs uschiglio datti trubels cun Eugen. Co far da vegnir sur las rundas fin il glindesdi cura che la nova paja è sin il conto?

Jau fatsch il plan da menus. Gievgia cuschin’jau spaghettis. Salata per ina tschavera hai jau er anc en frestgera. Venderdi datti tartuffels en paletscha, maionnesa e keth-up – senza salata. Sonda datti tartuffels brassads, maionnesa e ketch-up – senza salata. E dumengia pudess jau far ovs en paintg. Hai insumma anc avunda

ovs en frestgera? Na, jau na crai betg. I sto nà daners. Tge pussaivladads datti?

Emprima proposta: Dumandar mes schef per in auzament da la paja – subito. Commentari tar la proposta: Va betg. Hai gia dumandà milli giadas, ed i n’ha nizegià nagut.

Segunda proposta: Scrivere ina columna da Ludmilla. La gasetta paja lura forse 50 francs. Commentari: Fin ch’ils 50 francs vegnan giessi trais mais. Sch’els vegnan insumma.

Terza proposta: Jau pudess damentar ladra. Commentari: Per questa clamada sun jau sco mamma d’uffants da scola anc memia liada. Ma igl è in’opziun

lucrativa per pli tard cura ch’ils uffants èn ord chasa.

Co pudess jau uss, immediat, sin il fletg vegnir tar daners? Nua hai daners? Cler! Sin noss conto, nua che nus mettain da la vart ils daners per la taglia. Là hai anc insatge pauc raps. Jau vom uss tar la banca e prend giu 100 francs da noss conto da taglia. I va gea anc intgins mais enfin ch’ils novs quintes da taglia vegnan.

Epertutgant la votaziun: Jau vegn tuttina a votar «na», sch’i va per scursanir la taglia dals ritgs. Lezs na ston la finala betg renunziar sin salata frestga perposta d’avair cumprà in pèr chalzers ed in zitg pommes chipes.